

**Ignis-aquae ac Gehennae ignis historiam atque prima tentamina
dissertatione hac chymico-medica inaugurali ... / publico eruditorum
exameni submittit ... auctor et respondens Iohannes Guilielmus Agricola.**

Contributors

Agricola, Johann Wilhelm, active 1731.
Camerarius, Elias, 1673-1734.
Universität Tübingen.

Publication/Creation

Tubingae : Typis A. H. Roebellii, [1731]

Persistent URL

<https://wellcomecollection.org/works/pu26w4uk>

License and attribution

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.




Wellcome Collection
183 Euston Road
London NW1 2BE UK
T +44 (0)20 7611 8722
E library@wellcomecollection.org
<https://wellcomecollection.org>

K 10369/B

N. VII. 2
18





Digitized by the Internet Archive
in 2018 with funding from
Wellcome Library

<https://archive.org/details/b30547477>

10,369/B

Q. D. B. V.

IGNIS-AQUÆ

68
70017

A C

GEHENNÆ IGNIS

HISTORIAM ATQUE PRIMA
TENTAMINA

DISSERTATIONE HAC CHYMICO-MEDICA
INAUGURALI,

ASSISTENTE DIVINA GRATIA,

AUCTORITATE GRATIOSÆ FACULTATIS
MEDICÆ,

P R Æ S I D E

VIRO NOBILISSIMO, EXCELLENTISSIMO, EXPERIENTISSIMO

DN. ELIA CAMERARIO,

M.D. AC P. P. O. SERENISS. DUC. WURTEMB.

CONSILIAR. ET ARCHIATR. AC. CÆS. N. C. HECT. III.

PRO LICENTIA

SUMMOS IN MEDICINA HONORES LEGITIME
OBTINENDI,

PUBLICO ERVDITORVM EXAMINI SVBMITTIT

AD DIEM XIV. APRIL. A. cto 1000 xxxl.

AUCTOR ET RESPONDENS

IOHANNES GUILIELMUS AGRICOLA,
RATISBONENSIS.

T U B I N G Æ,

TYPIS ANTONII HENRICI ROEBELII.



SACRI ROMANI IMPERII
REIPUBLICÆ LIBERÆ
RATISBONENSIS

SENATUI INCLUTO,
VIRIS

ILLUSTRIBUS, MAGNIFICIS, PRÆSTRENUIS,
PRÆNOBILISSIMIS, CONSULTISSIMIS, AMPLISSIMIS,
EXCELLENTISSIMIS AC PRUDENTISSIMIS,

DOMINO
CAMERARIO,

ET RELIQUIS
CONSULARIBUS

ATQUE
SENATORIBUS,

PATRIÆ PATRIBUS
VIGILANTISSIMIS,

DOMINIS PATRONIS,
EVERGETIS,

FAUTORIBUS AC PROMOTORIBUS
SUIS

OBSERVANTISSIME COLENDIS,

HANC DISSERTATIONEM INAUGURALEM

DICAT,

*PRO INNVMERIS BENEFICIIS PUBLICAS GRATIAS
PERSOLVIT,*

MENTEM DEVINCTISSIMAM TESTATUR,

ET

PROSPEROS OMNIUM RERUM SUCCESSUS

EX ANIMO PRECATUR

JOHANNES GUILIELMUS AGRICOLA.



Σ. Θ.

VNiversalia, Panacea, Polychresta, Arcana, Alkahest &c. dulcia nomina! Eridis poma! non adeo communi fato submersa ævi nostri nova adpetentis, prisca vero exhibitantis miracula. Currit adhuc Philosophorum Mercurius, splendet Ignis gehennæ, colitur Gemma rosæ, ponuntur lacrumæ Tumbæ Semiramidis sigillatæ & Helmontii amissæ lagenulæ, acclamant Memnones ☉ horizontalis crepusculum. Afficiet sanè non paucos Tantalæ fames sitisque, si Lullii, Paracelsi, Basilii, Helmontii fontes libare, ramosque totidem fructibus onustos aberud. Acad. Cæs. N. C. Dnn. Collegis Ephemeridibus suis passim insertos prehendere incipient: Si in *Dec. I. Anni VI. & VII. App. secretorum medicamentorum Cel. Cnœffellii Fasciculum, & ejusdem Obs. CVIII. D. I. A. IV. & V. de Alkahest Paracelsi & Helmontii* legent; vel P. Jo. Fabri *Scripta ad Holsatia Ducem, Dec. II. A. VIII. Appendici* inserta; aut *Anonymi Tumbam Semiramidis* jam supra notatam in *Dec. I. A. 4. & 5. Append.* una cum adjecto *Tractatu de Auro Aura Balduini* inspicient, quibus *Excell. Lentilii* de Alkahest jocosum judicium *Dec. III. A. III. App. pag. 101. & Dec. II. A. VII. Obs. CCIII. D. Hartm. Nic. Grimmii Experimenta chymica*; nec non *Archiatri Russici vander Beck Epistola altera de India rarioribus, & præcipue de Tanzuc Sinensium*

Actorum Volum. I. App. accedant. Mihi certe, dum ex siugulari benevolentia atque favore *Exc. D.D. & P. Alex. Camerarii*, Patroni colendissimi æque ac studiorum meorum moderatoris dexterrimi & prudentissimi, Tomos illos una cum aliis præstantissimis codicibus ex bibliotheca Ejus selectissima depromere & volutare benignissime concessum erat, ut attentiore animo legerem, quæ de Alkahest Philosophorum passim occurrunt, ratiocinia calcar addidit *omnia metalla, mineralia, & ad hoc cerenum pertinentia solvens, aliisque insuper phenomenis admirandus liquor*, ab aliquo tempore ex benevolentia Evergetæ, cui ob à teneris in me collata beneficia, dum spiritus hos reget artus, obstrictum me profiteor, communicatus, cujus vires nonnihil rimari jam persæpe erat animus. Et excitarunt non parum hæsitantem hætenus cel. tot virorum sententiæ, instar lapidis Lydii inservientes, quo in disquisitione progredi liceret eo melius; præcipue dum ex altera parte ab Inclytæ Universitatis hujus gratiosa Facultate Medica dissertationem inauguralem conscribendi impetrata accederet licentia. Qua occasione non frustraneum plene laborem me suscepturum spero, si liquorem hunc, præscitu atque permissu Dn. Inventoris sui, publico eruditorum examini subjecero, ansam forte præbens sagacioribus, ut similiter operi admoveant manus, & utilitatis, quæ in illo latet, thesaurum eo felicius citiusve eruant.

Ceterum si in hoc nisu tenuitas animi mei non æque alkahesticâ dubia & abscondita quæcunque solvendi & in liquidum deducendi facultate pollet; sed & aliis, quibus magis ambusti prunis sunt digiti, non parum, in quo se exerceant, relinquit, non negligentia, sed materiæ gravitati atque prolixitati id tribuant, conatus tamen æqui bonique consulant rogo. Faxit modo DEUS, ut omnia in sui gloriam proximique emolumentum cedant feliciter!

Con-

Constitutum apud Athenienses erat, ut in publicum prodituri & verba ad populum facturi initio statim, qui & unde sint, indicarent. Sic enim Thessalus M. Hippocratis filius in oratione sua: "*Convenire arbitror, inquit, qui non omni multitudi-
ni cognitus est, primum indicare, quis sit & unde sit, postea vero reliquam,
orationem persequi. &c.*", Eundem hâc vice morem gerat & ordinem liquor noster, paucis cognitus, jam vero multitudini sistendus. Breviter ergo historiam inventionis & augmenti sui præmittendo, *quis qualis-
que* in operatione sua & *unde* talis sit ante omnia pateant.

Primam ejusmodi liquorem elaborandi occasionem Ann. c1o10ccXI. Auctori subministravit, discursus verbalisque disputatio, quam in arte chymica ceteroquin versatissimus, existentiam tamen liquoris Alkahest pernegans, ipsi contrarium asserenti moverat. Possibilitatem ejus igitur probaturus Autor, quæ passim ex conversatione Cel. chymicorum, ut & in itineribus per Belgium, Angliam & Galliam absolutis sparsim hauserat, colligit, tentat, & præterlapso triduo aquam producit, in præsentia illius Pyrotechnophili ☉. ♀. & ♂. & seorsim in distinctis phiolis, & in una simul, sine ulla pellucidatis mutatione vel actione solventem, cujus solutionis fluidum per balneum abstractum in fundo reliquit lapidis instar induratum materiam, nonnisi diffracto vitro tunc eximendam, in aere libero vero in liquorem seu oleum fariscentem, quo inargentatio & inauratio frigida institui poterat.

Pauca hæc Phænomena Inventori, ulterius ut incumbat operi calcar addidere, excitato inprimis præsentia & conversatione faventissima Viri in chymicis peritissimi Anno c1o10ccXII. ad Comitium Imperii Legati, qui aliquoties in ædibus Autoris septem metalla, ut & crudas eorum mineras, conjunctim atque seorsim solvi cum voluptate vidit, magnumque offerens præmium communicationem serio sed frustra desideravit. Post hunc alii atque varii fuere, qui & curiosa & utilia multa sub illo latitare menstruo quidem subolfecere; Sed, cum penetrare illius compositionem nequirent, alto supercilio rem istam intuentes nauci fecere, indignabundi tamen se nescire quod despiciunt. Hinc etiam in Actis Vratislaviensibus ex abortu judicii varia desuper ratiocinia!

Longe majori vero gratia affectus dignatusque fuit liquor noster

menſe Majo anni ſubſequentis cIoIocccXIII. cum in perſonæ Principali dignitate fulgentis & concione Nobilium circumdatæ præſentia, quæcunque Principi illi inter ſexaginta objecta placuerunt conſumeret. Sed nec tunc rogatus Autor parefecit, in quo cardo rei verſetur.

Ipſe propter ingruentem nec leviter graſſantem peſtilentiam aliaque negotia ad tempus aliquod in virtutes huius menſtrui inquirere deſiit. Donec illum cIoIocccXIX. die xlx. Auguſti peregrinus quidam accederet, non apum more propria ſedulitate mel collecturus, ſed ſecundum illud Virgilii

— *Sedens aliena ad pabula fucus.*

qui blanditiis, precibus, donisque etiam invito obtruſis, effecerat, ut Autor in ejus gratiam liquorem ſuum, aliis licet obrutus negotiis, elaboraret, atque illo præſente viginti circiter diverſiſſima objecta penitus ſolveret, reliqua adproperante vesp̄era in craſtinum differens; Sed tunc jam ſibi ſapere viſus hoſpes perſuaſusque, ſe furtivis liquoris noſtri deguſtationibus & odoramine, quidquid in illo lateret arcani, naſo labiisque inſuſiſſe, tempus ſumptus itineris, quaſi ex hac ratione id ſuſcepiffet, dolere incipit, rem contemnere, obloquutorem agere, & contra veritatis lucem undique negare, quod ipſus viderat, tandem dona ſua repoſcere.

Quid Autor noſter? Reddit ingrato quod coactus acceperat, meſmor Guil. Alardi Epigramm.

Nil homine ingrato pejus reperitur in orbe.

Dixeris ingratum dixeris omne ſcelus.

Aſt ne preſſa hac ratione veritas penitus ſuccumberet, ſtatim die xxIV. ejusdem menſis in duorum Illuſtrium artis chymicæ Curioſorum & Notarii publici præſentia ſingula illa objecta, quæ ingratus ille hoſpes ſoluta viderat, & adhuc plura in liquidum commutat. Hæmatites tamen neſcio quo fato tum ſolvi non poterat, & liquorem hæcenus clariffimum turbaverat, pedem fixit hinc Autor ſolutionibus, & inexpectatus finis operi coronam ſi non abſtulit, tamen dubiam reddidit. Sed ad breve tempus. Compendioſa enim præparatione & adaptatione non ſolum hæmatites, ſed & poſtea per plura alia ſubjugata fuere a ſolvente noſtro liquore, ipſeque in illum perfectiorem ſtatum redactus, in quo nunc verſatur.

Stra-

Statum vero præsentem & novissimam aquæ solventis hujus conditionem nec dilucidius describere, nec firmitus me probare posse, mihi persuadeo, quam si partim ad supra laudatum Cel. D. D. *Camerarium* *αὐτόπτην*, in cujus ædibus ante paucas septimanas Pontinæ hujus experimenta, quantum temporis locique & apparatus ratio permisit, instituere, & inde perspecta phænomena adnotare benignissime mihi concessum erat, provocem, partim vero quæ mihi ex novissimis Dn. Auctoris litteris transcripta sunt, in compendio huc transferam.

Injeci nempe liquoris unciis circiter duabus

I. *Limaturam Saturni*. Factum hoc absque omni vel turbatione vel mutatione, scobe modo tenui ad fundum cito subsidente. Inde videbantur aliquot aëris bullulæ majusculæ; post, liquore sensim super prunas incalcescente, quasi quædam nebula; tandem copia bullularum minimarum, collectam modo nubem recta sursum tendentem representantium, ascendere. Hæ bullulæ non diffundebantur per liquorem universum, sed ex fundo phiolæ recta sursum instar columnæ volitabant, nec liquorem turbabant quidquam, nisi quod hic magis flavesceret, ceterum limpidus & coruscans. Nec de ramentis plumbi quidquam conspiciebatur moveri suo loco, sed jacere omnia quiete, donec aliquando nimis incalcescente vitro bullularum adscensus fortior fieret, & quasi ebullire liquor inciperet, quo tempore elevari quædam particulæ metallicæ, mox tamen ad latus iterum quasi recumbere vel subsidere; sed tum novus bullularum cylindrus ex iisdem sursum vehi cernebatur, usque dum dissoluta penitus fuerunt omnia. Dum hæc peraguntur, menstruo & vitro sic incalcescentibus, comparent in summo phiolæ, supraliquorem, nebularum quasi fluctuantes undæ, ad vitrum mox in guttas cogi visæ, & juxta phiolæ latera partim, reliquæ vero per superimpositi alembici rostrum tarde depluentes.

II. *Scobem Jovis*. Hæc à priori distincta vix ac ne vix quidem dedit phænomena, ne liquore quidem quoad colorem mutato, multo minus ut præcipitari quidquam deprehenderetur. Videbatur quidem celerius procedere & absolvi hæc solutio, sed in liquore jam bene calente, dum plumbum ipsi adhuc frigido fuerat injectum.

III. *Martis* alkohol. Hujus portio perexigua primo in fundo permansit, reliquo omni partim in summo liquoris hærente, partim propter adpensam aeris bullam, quam superficiei menstrui illapsa secum duxerat limatura, adscendente. Sed paululum concusso vitro rupta est aeris bulla, & ad fundum subsederunt penitus omnes martis particulæ, quo facto consuetus bullarum adscensus incepit, & ad omnimodam usque metalli evanescentiam continuavit. Hac unica cum differentia, quod sub medio solutionis fortissimæ martis portiunculæ interdum dispersæ vel projectæ, aut explosæ totidem minimarum bullularum radios, huc illuc actos jucundo spectaculo, repræsentaverint, instar quasi totidem parvulorum pyrobolorum per liquorem excurrentium.

IV. *Veneris* limaturam. Hæc uti plene & facile ad fundum delapsa, ita statim ex suis granulis minimis bullularum columna illico elevari cœpit, & ad plenariam usque solutionem perrexit, liquoris colore qualis hætenus manente nec viridescente, nec de pelluciditate quidquam amittente.

V. *Mercurium* cum Stanno in amalgama redactum. Ab hoc notari merentur tria. *Primò* bullulæ adscendentes apparebant paulo majores ac præcedentium metallorum. *Secundò* amalgama illud nitidum argenteum brevi videbatur nigrescere. Neque verò longe ita post *tertiò* ex improvviso pultaceum hoc amalgama in metallicam Mercurii formam transmutari, & egregiè splendens globulus mercurialis in fundo visus est, ex quo postea aucto liquoris calore copia minimarum bullularum ascendere, ipse vero pro rato imminui, atque tandem successive totus solvi & evanescere cœpit, nitido splendore illo sub finem remittente. Hujus tamen solutio tardius processit ac reliquæ omnes.

VI. *Lunæ* foliatæ portio injecta, utut cum aranæ tela teneritudine certans, fundum tamen petiit, brevique temporis spatio insensibiliter consumpta disparuit.

Superinjecta vero *Lunæ* limatura mox pristinum bullularum ascensum usque ad plenariam consumptionem dedit. Neque nunc quidem liquor mutatus, sed luteolus ut antea.

VII. *Auri* modice bracteati lamella fundum injecta vix attingens, præ bullulis aeris ipsam undique cingentibus albere visa, feliciter porro solvi,

solvi comparuit. Notari hic in transitu meretur, aurum ferè omnium citissime fuisse solutum, non saltim ac si minimâ omnium quantitate fuerit sumptum, sed & vera temporis proportionem.

VIII. *Cinnabaris nativa* pulverisata & immissa, quoad maximam partem liquori supernatavit, & quæ fundo immersa portio incalente menstruo mox superficiem petiit, ibique cum reliqua parte tam diu perduravit, donec penitus absorpta fuerat.

IX. *Antimonium* crudum imam vitri regionem statim occupans bullulis cinctum erat majoribus, quibus intermiscebantur minimæ, instar nebulæ adscendentes, quæ brevi tempore effecerant, ut antimonium evaderet colore citrinum, & ad limbum liquoris à vesiculis adhærentibus raptum tamdiu ibidem nataret, usque dum plane disparuisse visum est.

X. *Marcastea* illapla statim subsedit & nigrefacta bullularum columnam erigens, in totum tandem evanuit, ne minima visibili superstitie particula. Sic neque liquoris pulchritudini detractum eo quidquam.

XI. *Arsenici* portiunculæ bullulis circumdatæ majoribus, in calente liquore statim q̄s. saltare, sursum deorsumque moveri cœperunt, ritum hunc tamdiu servantes, donec nil amplius supererat.

XII. *Auripigmentum* similia cum priori exhibuit phænomena.

XIII. *Cobaltum* semper in fundo perdurans bullularum rursus diversam edidit speciem, majorum atque minorum, & antequam penitus solutum erat, colorem mutans quasi in vitream substantiam transiit.

XIV. *Magnes* præparatus menstruo vix injectus illud nonnihil obfuscavit, brevi tamen in fundo phiolæ collectus minimarum bullularum erexit trabem, liquore pristinam pulchritudinem recuperante & servante. Et huic prorsus similem in solutione se gessit.

XV. *Hematites* præparatus; Nisi quod majus temporis spatium pro consumptione ipsi concedendum erat.

XVI. *Talcum* & XVII. *Alumen plumosum* diu in calentis liquoris margine permanserunt, ita tamen, ut particulæ illorum magna bullularum copia fuerint circumdatæ, postea vero fundum & quidem constanter tenuerunt, nec ullo modo ad ascensum ulterius vi ignis cogi potuerunt, usque dum penitus solvebantur.

xviii. *Sulphur* crudum in solutione exhibuit bullas magnas, quæ in superficie liquidi suspenderunt ejus frustula, nihilominus successive imminuta, atque tandem, licet paulo longiori temporis tractu, plenarie tamen soluta.

Posthæc progrediendo ad illa objecta, quæ ex prioribus, igne, artificioque ulteriori aliam nata sunt formam, injeci

xix. *Minium*. Hoc vix liquorem tetigit, quin ruber ejus color in ex fusco & gryseo variegatum transiret, & post brevem minorum bullularum adscensum oculis se subduceret, menstruo nullatenus alterato.

xx. *Lithargyrium*, ad ima subsidens, & tempore & modo solutionis vix diversa à priori exhibuit phænomena, nisi quod in colore tantum magis albescere visum fuerit.

xxi. *Cerussa* intromissa liquorem albedine nonnihil tinxit, sed calefacto magis illo totaliter soluta est, tincturaque illa brevi omnis evanuit, nec frigefacto vitro rediit.

xxii. *Orichalcum* & xxiii. *Æs collectaneum* seu Caldarium cum Venere (§. IV.) convenerunt, posterius tamen tardius solutum est priori.

xxiv. *Viride aeris* statim post injectionem phiola leviter concussa disparuit, liquorem tamen ad tempus dilute viridi imbuens colore.

xxv. *Mercurius sublimatus* corrosivus subsedit statim & bullulis majoribus obsessus intra breve tempus visui se subtraxit.

xxvi. *Mercurius precipitatus* ruber in summo menstruo, antequam fundum attingeret, cum parvo strepitu subjugatus est.

xxvii. *Vitrum Antimonii* ut & xxviii. *Crocus metallorum*, ambo pulverisati, in basin phiolæ descendebant ac cito & plenarie solvebantur.

xxix. *Reguli antimonii* injecta scobs, fundo immersa & solvi incipiens, nihil præ præcedentibus plerisque objectis peculiare exhibuit, nisi quod citato bullularum adscensu citius consumebatur quam metalla, nec flaveret ut Antimonium crudum.

xxx. *Cinnabaris antimonii* non pulverisata descensu & adscensu frustulorum arsenicum imitata est, quin & bullularum magnitudine & duratione.

Haftenus expositis Salia subjunxi, ex. gr. *Saccharum*, *Sal commune*,
Vi-

Vitrioli species, Nitrum, Borracem, Tartarum, Alumen, Sal ammoniacum, Lapidem prunelle, Cineres clavellatos &c. Quæ omnia sine turbatione liquoris vel præcipitatione in integrum soluta, non alia quam consueta exhibuerunt phænomena.

Quid quod *Adamantem, Rubinum, Hyacinthum, Smaragdum, Sapphirum, Crystallos, commune Vitrum, Fel vitri, Alabastrum, Silicem, Osteocollam, Etitem, Pumicem, Porcellanum, Chalcitem, Ceraunium, Judaicum, Calc. viv.* aliosque lapides, certo modo præparatos, ab hoc nostro menstruo, quantumvis prioribus omnibus jam dum gravido, æque tamen feliciter adhuc & expedite solutos pronuper demum vidit, atque in majorem experimenti fidem scripto quoque testatus est, cum in itinere suo literario Dn. Auctorem aliquoties invisere dignaretur, Vir non eruditione modo scriptisque, sed & conversationis suavitate, atque animo ad curiosa quævis adtentissimo etiam hic Tubingæ adhuc Celebris Dn. *Joh. Georg. Keyserus*, Societatis Regiæ Londinensis Membrum.

Extendi posse vires menstrui nostri etiam ulterius ad Regnum tam Animale quam Vegetabile demonstrant *Margarita, Corallia, Mater perlarum, Dentes Hippopotami, Lapides cancrorum, Dueleck, Bezoar, Charta, Carbones, pili, setæ, corium, paleæ solutæ.* Quin per alembicum destillato si vini spiritum addas, *Gummi-resinis & Aromatibus* recludendis solvendisque adaptatur.

Sed satis pro instituti ratione de liquore nostro scriptum puto, quod ejus solvendi attinet potentiam. Id saltem subnecto, ob temporis brevitate & evitandum dispendium, in parcâ dosi injecta fuisse objecta singula, nec tamen ideo suspensionem habendam esse, ac si seorsim & in quantitate liquori tradita objecta minus, vel difficiliter, vel cum aliis circumstantiis solvantur. Vidi certe Dn. Auctorem hujus menstrui æque felicem, in copia cum pararet sibi solutiones suas, ac dum compendiosa phiola opus suum absolveret. Attamen fatendum est, nonnulla corpora peculiari enchirisi opus habere.

Jam vero pedem ad proponenda reliqua promoveo. Potest nempe ex quocunque hac ratione soluto objecto *lapis* vel materia dura confici; nunc hujus nunc alius, coloris, qualitatis & adfectionis, quatenus vel seorsim & solum, vel multa paucave alia una cum illo soluta sunt. Quin

imo omnia hæcenus recensita objecta unum, & quoad externam faciem, homogeneous dant lapidem, in quo omnes solutorum corporum particulae reconditæ, & nonnisi in externa forma mutatae deprehenduntur.

Rediguntur autem soluta in lapidem fundo inhærentem, destillando menstruum super alembicum ignis moderati regimine. Ubi super vacuum credo, colorum diversorum syllabum hic adnectere, variant enim quam diversissime, nec tamen adeo multum ad rem contribuant.

Hunc in modum constructus lapis vix nisi diffracto vitro potest eximi. Si vero in cellam per aliquot dies, vase aperto reponitur, totus fatiscit, indiesque magis vertitur in fluidum, quod secundum receptam à longo tempore consuetudinem oleum vocari consuevit.

Sed antequam de eliquato hoc lapide plura proferam, prius adhuc de solido ipsius statu notare pauca liceat: Quidquid à menstruo solvitur, etiam in talem lapidem redigi potest. Deinde lapis ille liquori denuo injectus sine ulla reactione facillime solubilis & rursus per abstractionem reducibilis est. Tertio lapides præcipue, si ex seorsim & singulatim solutis metallicis corporibus componuntur, rara in igne exhibent phænomena. ex, gr. Si ex soluta Venere paratus lapis crucibulo tecto inditur, & inter prunas, ut probe rubescat tigillus, reconditur, ex improvise flamma prorumpit luculentissima, viridissima, rapidissima, oculis intolerabilis, ut prunarum ignis quasi deliquium pati, fatiscere, vel extinguí videatur præ fulgore hujus alterius. Vocavit ergo Autor flammam hanc *Ignem Gehennæ*. Reliquorum metallorum lapidibus eadem est conditio; Solis lapis purpuream; argenti & mercurii albidissimam; martis croceam &c. evomit flammam, apertus crucibulus autem fere vacuus est, vix vestigia lapidis pauco relicto sale & fuligine servans.

Nec alia colorum diversitas, (si solis oleum excipias, quod citrinum est,) in oleis observatur, quæ post primum in aere deliquium turbida, iteratis vero evaporationibus & resolutionibus limpida comparent, non relicto sedimento. Gustata linguæ præter ustionis, etiam fæsedinis cu-

jus-

jusdam, sed peculiaris, atque pro metallorum conditione, adstrictionis & siccitatis sensum imprimunt & relinquunt.

Olea hæc sive invicem commisceantur, sive menstruo suo abstracto, sive novo liquori instillentur, neque reagunt, neque turbantur vel turbant. Cum spiritibus ardentibus aut spiritu salis ammoniaci unita, suavitatem quandam & colorem plerumque spiritui largiuntur. Aquæ simplici destillatæ immixta lacteo illam imbuunt colore, & tarde sedimentum, pro ratione coloratum, deponunt, quod vero non adeo facile contingit, si aqua saccharo cando saturata & edulcorata est.

Superest quid in metalla agant olea illa, præcipue metallorum, patefacere. Solis oleum orichalci vel veneris laminæ illitum, hanc leviter modo calefactam, ut humiditas omnis abigatur, atque sale communi deterfam, sistit ex tempore deauratam nitidissime. Pari modo lunæ & mercurii oleo inargentationem, alteram constantem, alteram transitoriam; Jovis oleo instannationem, ut ita dicam; Veneris oleo faciem Martis cupream obtinebis. Et si sublimare metalla satagis, instilla floribus salis ammoniaci, per solutionem paratis, metallorum olea guttatim, sic Solis oleum purpureum; Lunæ & Mercurii album; Martis, ut solet, croceum; Veneris viride; Jovis & Saturni gryseum mediante igne dabunt sublimatum, & hoc cum plerisque reliquis pariter procedit.

Restarent quamplurima, imprimis quod ad metallorum post sublimationem destillationes, vel lapidis ad *absumendas cancras* corporis partes utilissimi præparationem, vel usum pictorium attinet, quatenus ad tabulas eburneas pulcherrime & constanter tingendas pingendasque colores & tincturas exhibet diversissimas &c. Sed hac vice nondum expediri possunt omnia, occasione cuicunque meliori reservanda. Trigam tamen quæstionum hic me vix declinare posse sentio. Prima earum est: *Quisnam igitur, qualis & unde sit hic noster liquor?* altera: *Quo jure mereatur predicatum istud, ut videtur, paradoxum in titulo disputationis ipsi datum?* Tertia: *Quibus tandem usibus inserviat? Num aliqua etiam in egrotos inde deriveetur utilitas?*

Quod igitur concernit quæstionem primam, hujus resolutionem sic adornare teneor, ut justo tamen Evergetæ desiderio simul satisfaciam.

Scilicet Inventor hujus menstrui compositionem atque præparationem ejus propalare vel triviis omnibus exponere, atque adeo præmansum quasi bolum faucibus oscitantium ingerere, nondum vel necesse vel consultum esse totus reputat, adeoque plenariam arcani publicationem hætenus modestè deprecatur, describere tamen nihilominus, atque vivis, quod ajunt, coloribus illum depingere neutiquam veretur, eoque ipso Pyrophilos curiosos ad tentamina istius modi pyrotechnica instigare, quam ex inventione nova vanam laureolæ gloriam captare mavult.

Scias igitur *Lector*, quem præstolamur, *Benev.* liquorem nostrum esse totum limpidum, odore ac sapore admodum penetrantem, absque tamen ullo virium suarum dispendio per longum sane temporis tractum facile asservandum, ex duobus maxime principiis, *sale* nimirum *mercuriali* atque *spiritu* catholico panchresto, sine multo artificio haud difficulter parabilem, atque post centenas licet corporum diversissimorum solutiones toties abstractum, solvendis tamen iterum novis corporibus nihilominus idoneum.

Ceterum ad declarandam specialius materiam ejus liceat tantisper mea facere verba acutissimi D. D. *Cohausen*, cujus *Helmontium Ecstaticum* nuperis auctumnalibus nundinis opportune sibi comparavit, & benevole mihi communicavit supralaudatus *Exc. D. D. Camerarius*. Ita autem ille sub finem præfationis in *Diff. pyrotechn. curios.* quam calci operis pro supplemento sensationis ultimæ Helmontianæ adjunxit: “ *Argentum vivum*, inquit, *vulgi*, neque in sua substantia, neque aliquid ex eo, quomodocunque id audiat, sive primum ens, sive natura media, sive spiritus aut aqua: est materia in vel ex qua, proxima vel remota, liquoris *Alkabeftini*.”

Quibus addo quædam ex *Helmont. Tract. de Potestat. Medicamin.* §. 24. “ *Summus atque felicissimus salium est*, qui ultimam puritatis & subtilitatis metam in natura attigit, cuncta pervadit, solusque agendo manet immutabilis, quique alia pro lubitu promptâ resolvit obedientiâ, rebellemque omnem materiam non secus atque aqua calida nivem liquat & volatizat.” Sed hæc sufficiant.

Ad

Ad Quæstionem alteram responsionis loco habe, quæ in *Helmontio* suo *Ecstatico* modo citatus *Cel. Cohausen* Sect. 1. pag. 21. scribit. "*Liquor iste, dicitur IGNIS, quia igne fortius urit & calcinat, unde & appellationem IGNIS GEHENNÆ accepit. Philosophi dicunt: Vulgus per ignem cremat nos per aquam. Dicitur AQUA, quia in statu actualis fluiditatis est instar aquæ, omnia resolvens, & finaliter reducens in aquam elementalem: Dicitur IGNIS - AQUA, ut nempe hæc duo essentialiter differunt, sic differenti & genuino vocabulo exprimuntur, verum ex his arte conjunctis in hoc liquore factum est unum inseparabile, quod proin utriusque nomine connexo designatur. De quo illud in Museo Hermetico:*

*Ignis, aqua & fluitans duo sunt contraria, felix
fungere si nosti, sit tibi scire satis.,*

Ubi tamen & hoc ingenue fatendum est; de nostro quidem liquore nondum affirmari posse, quod de suo quondam alkahest prædicaverat *Helmontius*. Scilicet objecta, dum solvuntur, ita per liquorem nostrum disperguntur, ut æqualiter ipsi dixeris misceri, & per ipsum undique diffundi, dum tamen *Helmontius* ista cum liquore solvente non permisceri, sed in peculiarem & distinctum liquorem cogi & transmutari ubique fere testatur. Sic nempe *Tr. de Complex. atque Mistion. Elemental. Figmento*, §. 27. dicit: "*Novi aquam (quam manifestare non libet) cujus medio omnia vegetabilia in succum destillabilem, sine ulla sui in fundo vitri, residentia commutantur &c. Et in sequenti §. 29. "posui carbonis quercus, & aqua cujusdam, partes æquas in vitro hermetice clauso, spatio tridui, totus carbo versus est tepore balnei in duos liquores diaphanos fundo & colore, varios.*

Quicumque ergo in locis his citatis Alkahest sub vocula *AQUÆ* intellectum credit, & verba statim subsequencia: *Liquor vero solvens manet in fundo paris ponderis sibi & virium*; aliaque loca ubi passim alkahest, non destillari posse, sed semper in fundo hæreere asserit, accuratius ponderat, certe illius ab aliis menstruis diversam actionem perspicue deprehendet.

Atque ex illa ratione non procul à scopo esse sibi persuasit duorum potentissimorum quondam *Poloniæ Regum cel. Archiater Cnæffelius*, de

cujus alkahest in *E. N. C. Dec. I. Ann. VI. & VII. append. inter medicamenta ejus secretiora Tit. XXVII. pag. 194.* plura legenda occurrunt. Quatenus nempe triplicem liquorem ad tria naturæ regna sibi comparavit, quo omnia objecta in sua tria principia resolvere; resoluta spiritu vini extrahere, & tunc post illas operationes alkahest suum intaminatum rursus & ad eodem usus aptum obtineri posse, asseruerat.

Quemadmodum vero meum non est, alienis memet immiscere, vel lites istas dirimere: num Paracelsi *specificum corrosivum*, Helmontii *alkahest*, Hermetis *Aquina forma pontica elementa dissolvens*, aliorum *Mercurius Philosophorum* sit unum idemque? Atque etiam, num revera existat, vel existere saltem possit, menstruum istiusmodi universale alkahestinum? &c. Quum de his, atque pluribus aliis huc apprime facientibus, & de aureo illo vellere sollicitos, deque ejus lana adeo certantes Jases, ablegare omnino malim ad disputationem illam pyrotechnicam, jam semel atque iterum laudatam, ut ipsi judicent, quo cum fundamento ibi possibilitas ejus probata; dubia discussa; materia, usus & excellentia ejus descripta; Mercurius vulgi vero, qui hactenus ad tabem usque philosophis salivam movit, relegatus, & ex ingredientibus liquoris alkahest exterminatus sit? adeo ut *Mercurius* in anagrammate jam suis tortoribus objiciat: CUR ME URIS?

Ita pedem nunc promoveo ad quæstionem tertiam, magis practicam, & circumspicere incipiam, *quibus usibus hæc omnia inservire possint?* Concedam, curiosum saltim videri, omnia metalla ab uno menstruo solvi, nec præcipitationem consuetam per metalla vel per salia, sicut in aqua forti vel regia, contingere. Interim tamen non parum eo firmatur eorum sententia, qui non solvenda, sed solvens reactionis causam esse volunt, nec active illa se gerere contendunt. Quam hypothesin mordicus etiam *Helmontius* defendit, variisque exemplis illustrat. *Tract. de Ignor. Action. Regimin. §. II.*

Deinde Mercurii ligati phænomenon Problema subministrat: Annon hac ratione Mercurius vivus optime & facili negotio purgari, eoque ad Barometra construenda maxime idoneus reddi possit? Mercurium enim præ

præ reliquis plerisque metallis diutissime à Menstruo intactum relinqui experientia docuit.

Tertio, universalis hæc metallorum solutio multa inermat chymicorum argumenta, quibus acute rationes depingere studuerunt, propter quas Sol & Luna diversas claves postulet? Ubi eorundem præcipitationis leges? quæ procedunt juxta tritum illud: Magis dilectus. Tertius interveniens. Cede majori. &c. Non vacat tamen hac vice talibus immorari diutius, se ad usum magis medicum properare, & quomodo ægotantium commodis hic liquor noster inservire possit, vel digito saltem indice ostendere.

Non enim ex. gr. cum officinalibus ex auro præparatis adeo contenti hæctenus fuerunt Medico-Chymici, quin potius in novissimo *Actorum N. C. Volum. II. observ. CLxxl. Excell. D. D. Mingius veram*, ut vocat, purpureamque *solis extractionem* publico communicaverit & commendaverit.

Fuerunt ab omni pariter tempore, qui Israëlitarum compotatores evadere sategerunt. i. e. *Aurum potabile* sorbillare, sibi que parare omnibus nisi sunt viribus.

Ita *Helmontius Tract. de progymnasmate Meteori. §. 6.* Aurum in forma olei punicei per retortam destillat, sed inde rursus præcipitari & reduci posse asserit.

Etmüllerus in Comment. ad Schræd. Tit. de Auro potabil. refert. Paracellsum Aurum volatilizando & irreducibile reddendo, vinique Spiritu tincturam ejus extrahendo, parasse suum Aurum potabile. de quo *Libr. VI. de resuscitatione rerum naturalium pag. m. 896. consule.*

Attentionem quoque meretur, quæ in E. N. C. Dec. I. Anno III. & IV. *App. pag. 145. à Chr. Ad. Balduino de Auro aure potabili Cap. X. notantur*, "ubi gustatum, salsedinem aliquam lingue imprimere, & §. 2. scribit: "Pari ratione Aurum ex aurâ inferiore, seu nitro nostro fieri potabile potest. (Si scilicet Alkabeſt in summam rubedinem per se figas, aut initio statim cum Auro metallico purgato conjungas, inque perficias lapidem) quod, in omnibus liquoribus Medicina in usum solvi posse non hodie demum credi, cæpit."

Aures

Aures etiam titillant, quæ de insipido Auri menstruo *Agricola Comment. in Popp. Tr. de Auro pag. 22. Laurenberg. contr. Salam aphor. 5. & Bartholetus L. V. de Respirat. cap. 3. pag. 413. nec non Zwelfferus in Mantiss. Hermet. pag. 331. legenda tradunt.* Quorum posteriores duo ex Lapide Lazuli & Marcasita solvens tale extorsisse referunt. Ut taceam Auri potabilis Londinens. cum aqua regia, vel cum Spiritu Vitrioli Philosoph. spiritu mannæ, oleis aromatum destillatis præparationes, item quas *Jungken in Lexico suo chymicopharm. pag. 51. cum spiritu & sale fixo urinæ, vel nitro, alumine, sale communi & spiritu vini ad modum du Febure* tradit. Quibus subjungi potest illa casualis cum lapide calaminari tincturæ solis productio, cujus in *Dissert. Inaugurali sua de Acidulis Teinacensibus* Clar. D. D. *Gmelinus* Fautor & amicus mihi æstimatissimus *Cap. IV. §. 73. mentionem* fecit.

Ast quis modos singulos, mediaque, quibus in concoquendo liquore adeo amabili tot defudarunt æmuli, narrabit? Vana forsân spe delusi sunt illi, qui spiritu nivis, sale cranii humani, capillis, fimo columbino, aurium excrementis &c. aurum ad potum adaptare studuerunt.

Egit fusius de auro potabili *Andreas de Blawen* in Epistola ad *Matthiolum*, quam vide in *Lib. IV. pag. 175. Epistol. Medicin. Matthiol. Dioscoridi annexarum*, & ope olei salis optime illud parari posse experimentis suis probare annititur.

Omnia véro vota collegisse & selegisse videtur jam toties nominatus *D. D. Cohausen*, qui in tractatu suo de *Revisa Potest. Medicaminum Sect. II. p. 65. ita concludit*: “Genuinum aurum potabile, quale dari nemo nisi *Misochymicus* inficiabitur, non est nisi Aurum tota sua substantia, (non autem abstractione, tinctura putativa) in peculiari suo salino menstruo permanente radicitus solutum, ut in omni liquido instar salis aut sacchari solvi, & solari sua essentia, calore, colore, puritate, & vitali volatilisata virtute penetrantissima, per vasa lactea ad sanguinem, imo per universi corporis permeabilis ac transpirabilis tubulos minutissimos deportari possit.”

Quibuscunque vero hæc recensita aurea nectara nec ad manus nec ad palatum sunt, nostrum gustent, vel tentent, si placet Aurum
pota-

potabile, quod compendiose ex oleo solis cum spiritu vini vel salis ammoniaci paramus, & fulva atque aurea naturali sua tinctura gaudet. Non pauca pariter de illo monenda essent, præcipue, quantum jam ab aliquo tempore Autori præstiterit usum, sed hæc ad aliam occasionem tempusque reservari volunt.

Addo potius *Lunam potabilem*, eundem in modum parandam, melioris forsan notæ tutiusque remedium quam Sapphirinæ, cœruleæ fucæque meretricio exornatæ tincturæ lunares ex vitriolo, calce vel scobe argenti cum spiritu salis ammoniaci paratæ, merito à Clar. *Rockio* in *Diff. de Chymiatría superstitiosa explosæ*. vid. *Jungk. Lex. Chym-Pharm. Schræder. Lemery* aliosque de tincturis lunæ.

Auger etiam, sed dubito, an præter necessitatem, numerum medicamentorum martialium, nostrum *Martis* oleum, guttatim vel in Elæosaccharo, vel cum spiritu vini, vel aliis exhibendum. Ubi Lectori Benevolo decidendum relinquo: Utrum præstet semper martis partiales & superficiales tincturas, vel D. *Ludovici ex Vitriolo martis in E. N. C. D. I. A. III. obs. CCL. pag. 453.* ad atrophiam adeo laudatam, vel *Zwelfferi, Ettneri*, aliorumque in usum vocare; An vero martem in totum ope liquoris per deliquium parati dissolutum, & in oleum croceum diaphanum redactum, dare?

Manet profecto martis illud oleum corticis peruviani in debellandis febribus, ictero, aliisque morbis fidelis commilito. Qua occasione non possum abs me impetrare, ut silentio præteream, quâ cum voluptate recentissime editam etiam Cel. D. D. *Cobausen Exercitationem medico-practicam de usu & methodo rationali, solida, certa & secunda Corticis Peruviani &c.* legerim; non enim solum hujus febrifugorum maximi Imperium longe ultra febres intermittentes extendit, sed & ejus in Ictero præstantiam Cap. ultimo pag. 107. albo calculo defendit exemplo dignissimo. Quatenus nempe Icterus post quartanam usui corticis adscriptus, cortice continuato brevi & feliciter sublatus est. Conformis certe cum illa Thesi, quam ante octimestre in Dissertatione, cui Titulus: *de corticis usu à febre ad Icterusum extenso* defendi.

Maxime vero attentum me reddiderunt, quæ in ultimo elegantis hujus opusculi folio, de *mixtione & temperatura corticis, cum sulphure minerali sedativo*, ET SALE PECULIARI FIXO, CUI IN TOTA RERUM NATURA PENETRATIONE, ABSTERSIONE ET RESOLUTIONE NIL EST SIMILE, profert. Cujus arcani descriptionem non obtorto adeo collo ad nostrum sal, quod primarium menstrui ingrediens est, trahere & applicare possum.

Quin imo plurima, quæ ab hoc Viro tam in *Helmont. suo Ecstatico*, quam in *Dissert. de Alkabeſt* scripta deprehenduntur, ita comparata sunt, ut quoad maximam partem cum nostri liquoris actione & materia collimare videantur, exceptis paucis, quæ hætenus non adeo absolute nobis vindicare volumus. Hinc prima vice, dum opusculum hoc perlegere cœperam, diu dubius hæsi, utrum Thema hujus nunc Dissertationis meæ prosequi, vel aliud substituere consultius sit. Sed cum de occultis judicari non possit, minima circumstantia sæpe rem variet, & unius rei prædicata plerumque in perplures alias quadrent atque cadant. in proposito, quod cœperam, perduravi.

Revertor, Martique subjungo *Jovem*, qui hætenus sub calcis, pulveris vel cryſtalli forma corpori nostro commissus, nunc ut oleum seu liquor propinari potest, & quidem sine spoliatione maximæ partis sulphuris sui, quod præcipuam efficaciam habere plurimi credunt.

Accedit hisce nova larva *Mercurii*, sub specie olei & sublimati albi non vero aperte corrosivi incedentis. Cujus vires tamen experiri Dominus Auctor hætenus nec ausus est, nec occasionem habuit.

Quibus tandem *Venerem* atque *Saturnum* in viscera corporis humani mittere consultum videtur, variationis gratia nunc & olea & tinturas, & flores illorum habeant, ceteroquin externe in chirurgicis varii usus.

Tantum de præparatis ex Metallis. Ubi adhuc subnecto, flores ex sublimatione metallorum cum oleis fere unius ejusdemque virtutis esse. Ceterum præter Mercurium & Saturnum metalla cum Sale Ammoniaco esse sublimabilia, jam ex *Hoffmann. Clav. Zwelffero*, *Mylio* aliisque constat.

Nunc

Nunc ducor quidem in ordine ad mineralia & objecta reliqua, ex quibus tamen potiora tantum tangam.

Occurrit *Cinnabaris Antimonii* atque *Nativa*, ut & ipsius *Antimonii crudi* integralis solutio.

Menstruum tale jam pridem chymicos in votis habuisse vel commendasse quis est, qui ignoret? Excell. *Frid. Hoffmann. in Exercitat. de Cinnabr. pag. 117.* ait: "*Quodsi menstruum datur talis modi, quod Cinnabarim nostram solvere possit sine destructione textura, medicamentum sane, exsurgere posse longe excellentius ipsâ Cinnabari non ibo inficias.*",

Deinde *Paracelsus de vita longa Libr. III. Cap. IV. de Antimonio* serio jubet: "*principio vide ne Antimonium corrumpatur, sed totum hoc, quantum est integrum maneat citra ullam mutationem forma.*", & *Helmontius Tr. de magna vulnerum curat. §. 154. de Antimonio* declarat: "*quam diu in sua forma manet summas proprietates obtinet, quas in suis principis nunquam assequitur.*", Formam vero internam subintelligere ex *Tract. Ignotus hydrops. §. 40.* patet. "*Observavi, inquit, si Antimonium in liquorem vertatur, & postmodum in pulverem, qui tantum per sudorem purget, haberi remedium, quod omnem hydropem modeste tollit.*", &c.

Hocque remedium *Stibii solutivi*, *Mercurio* suo diaphoretico & miraculoso proxime ad latus ponit l. c. §. subsequo. 49. Porro *Tr. de Arcanis Paracelsi p. m. 481.* Expresse tincturam *Lili* & *Mercurium vitæ Stibii prolem integri* appellat. Qua ratione non parum habet, quod sibi gratuletur de essentia suâ antimoniali & *Cinnabarina* *Doctissimus Cohanzen*, quatenus integri *Antimonii* productum esse asserit, paucula enim, quæ in *Helmontii sui Ecstatici Sect. II. pag. 86.* & sequentibus de istiusmodi essentia atque tinctura profert lectu & imitatione, sunt dignissima.

Quantum vero chymico medicoque intersit *Antimonium* sulphure suo conjunctum vel spoliatum habere, facile perspiciet, si modo Excell. *Frid. Hoffmann. observ. Physico-chymic. Lib. III. Observ. III. de mirabili virtute Antimonii virul. & med. legit.* vel novam *Cel. D. D. & Prof. J. H. Schulzii* observationem de *regulo Antimonii medicinali* compen-

diſſiſſime & tutiſſime cum nitri puriſſimi part. I. & part. IV. Antimonii crudi ſine ſale communi præparandi modo, quam inſeruit Saluberrimi novi Commerçii litterarii Norimbergensis ad rei medica & ſcientia naturalis incrementum &c. Specim. X. pag. 76. A. 1731. 7. Martii. Addo ex diſcurſu Exc. Dn. Præſidis me intellexiſſe pulveres illos, qui in Gallia hætenus, ſub titulis *des poudres d'or* & *poudres de Bibal*, laudibus tantis evehuntur, etiam ex Antimonio, & quidem ejus ſulphure præparari.

Marcaſita poſt ſolutionem in lapidem oleumque redacta, hocque ope ſpiritus Meliſſæ, Lavendulæ, Anthos &c. in eſſentiam quaſi redactum non minus erit cosmeticum ac magiſterium ejus, quia conſtat, etiam per ſe ſpiritus ardentes cutem albidiorẽ reddere, ſolutæque particulæ Marcaſitæ magis extenuatæ ſunt. Fucus autem excellentioris gradus ex ſolutione Talci præparabitur. Cujus nullum hætenus vel ad ſummum unicum menſtrum dari, in ſupra allegato *Novo illo Commercio litterario Norimbergensi*, Specim. III. A. 1731, pag. 22. Celeb. D.D. Joh. Chriſtoph. Gœzii ex MS. chymico aſſerit, & talci oleum ſummis laudibus extollit. Quoniam vero ſolventem liquorem ſubtricit, non auiſim declarare, an cum noſtro conveniat vel diſconveniat. Ceterum non impoſſibile credo, noſtrum Talci oleum in unctuoſam & ſaponaceam ſubſtantiam transformari poſſe, præcipue ſi ejusdem *Commerc. Litter. Spec. XI.* pag. 14. Cel. D.D. *Geelhaufen* animadverſionem in modo notatam obſerv. Exc. D.D. *Gœzii* pondero, ubi menſtrum tale pro Talci oleo ſufficere aſſeritur, quod ſulphureas ejus, ex quo potiſſimum conſtet, particulas ſolvit. &c. Ob confiniam materiæ tertium adjungo, quod certo reſpectu etiam cosmeticum dici poſeſt. Scilicet tincturam ſive oleum Lunæ capillos, ciliaſ & ſuperciliaſ nigerrimo colore tingere, dummodo poſt circumlinationem pars tingenda à ſole ad aliquod tempus irradietur, habet & conſtantiam iſtiusmodi tinctura & pictura capillorum, ita ut lotionibus & unctionibus non obſtantibus ultra biennium perduret.

Tranſeo ad ſulphur, quod in ſubſtantia interne optime exhibendum eſſe creditur, & baſam̃is ex illo præparatis vel ex hac ratione præferatur, quia illud ſolventia olea non adeo indiſcriminatim conveniunt. Salificatum ſulphur, i. e. explicante Cel. *Cobauſen* ſalibus penetratum totumque

tumque solubile redditum, tanquam corporis nostri summe mundificans dudum tentarunt Philosophi, & felicem ejus possessorem in vindiciis semet declarat *Cnæffelius*, omnibusque medicis gratulatur, quibus adeo licet esse felicibus. Num ergo & nostra sulphuris solutio & præparatio sulphur salibus penetratum vel salificatum dici potest?

De salibus nihil certi affirmare audeo, utrum tam diversæ species post solutionem in lapidem oleumque redactæ, plus an vero minus efficares reddantur, quia experientia mihi adhuc deficit.

Quod lapides pretiosos, crystallum aliosque concernit, *Adamantem* duritie & pulchritudine omnibus antecellentem, tamen vincibilem esse, non solum *Helmontius Tr. de Terra §. 4.* testatur; siquidem facilius resolubilem in aquam illum declarat, quam arenæ speciem, quam *quellam* vocat: Sed & *Fr. Basilius Valent.* non obscure Spiritui suo calcis vivæ eandem virtutem tribuit, parte V. **Von übernatürlichen und hochtheuren Wunder-Ärgnehen/** p. m. 263. affirmans, omnes etiam durissimas Crystallus ope ejus esse solubiles. Item *Paracelsus de igne gehennæ Archidox. libr. 7. de specificis* asserit, specifico illi corrosivo neque adamantem resistere posse. Arroget hinc sibi pauxillum gloriæ laurique ramulum liquor solvens noster, quod etiam Adamantem solvit, licet forte nec *Helmontii Alkahest*, nec *Paracelsi Ignis gehennæ*, nec *Basilii spiritus calcis vivæ* sit, nec inde solutionis illius usus medicus elucescat.

Majoris sine dubio usus forent reliquarum *Gemmarum*, item *Margaritarum*, *Coralliorum* &c. solutiones, ex quorum objectorum oleis, præter supra notatam methodum, facili negotio in forma lactei liquoris *Gemmae potabiles* exhiberi possunt, & succedaneum forsan quoddam parari illius hodie adeo celebris *lactis perlarum & Margaritarum essentia*.

Supereffent profecto tam de hisce quam vegetabilis & animalis naturæ regni objectis proponenda perplurima: Nec non de igne splendidissimo & penetrantissimo Lapidum metallicorum, si ignitis crucibulis includuntur; (Cui analogi quid *Cel. Frid. Hoffmann. in observ. Physico-Chym. supra notatis Lib. III. obs. I. pag. 260, cum Auripigmento &*

sale communi observavit :) Vel de sale ipso, ex quo liquor noster constituitur, quodve per se fixum est, in eo tamen ab alkalium indole ablutit, quod non in igne funditur, nec acida in siccam aut crystallinam consistentiam, sed in deliquidam coagulat &c. multifaria monenda: Verum enim vero hactenus recensitis in tantum scopo meo satisfacisse arbitror, in quantum inde comparuit, non minus curiosa quam utilia haece objectorum analyses includere.

Quantum autem adhuc ad modum procedendi, solvendi objecta, & ad usum medicum adaptandi attinet, Ignis auxilium & cooperatio necessaria pro solutione non adeo male verti potest, siquidem etiam Helmontii alkahest pro singulis solvendis, per triduum in balneo sudare debuit.

Deinde Metalla nonnisi vel tenuiter bracteata, vel in subtilem scobem redacta Circulato suo committere ipse Paracelsus jubet *Libr. Archidox. IV. de Magister. Metall.* eoque universalitatem menstruorum non objectorum praeparationes excludere aperte ostendit.

Porro ibidem & *Libr. VI. de Resuscitatione rerum naturalium* Lunam, Martem, Venerem, Saturnum, Jovem & Mercurium potabilem, non alio menstruo nec processu aut Enchirisi parari posse testatur, quam ipsum aurum potabile, & *Libr. IV. Archidox. Tit. de Quint. Ess. Metall.* cum metallis ita procedere suadet, ut post solutionem in aquam, illiusque abstractionem, putrefactione oleum obtineatur, quod cum Alkohol vini digestum Q.E. Metall. vel Metalla potabilia constituat.

Dicit ulterius *Libr. III. de vita longa Cap. III. de Elix. Auri*: sine corrosivo Aurum mortuum; sed post solutionem corrosivum putrefactione abigendum esse, & admonet insimul, “non abhorreat animus ab illa tractandi ratione.,,

Pariter *Andreas Libavius Apocalypsi Hermet.* parte prior. Cap. xix. Ex Chymicorum Litteris expresse docet, pro *Auro potabili vel corrosivo vel non corrosivo menstruo requiri*: Illud vero, quod per corrodentia paratur Aurum potabile non per se venire in usum Medicum &c. tandemque adjungit: “*Verum aurum potabile non prius fieri, nisi in lapidem solem rede-*

rederis artificio suo, quod solis Philosophis notum est, à nullis descriptum, &c.

Addo, quæ *Beccherus in Physic. Subterræn. Lib. 1. Sect. V. Cap. III. §. 62. de Spiritu Vini* profert: "Eo usque, scribens, mortalium industria pervenit, ut aurum, omnium metallorum gravissimum, subtilissimo & volatilissimo spiritui vini adnectere possit, ut & simul evaporent, destillent, deflagrent, nulloque modo amplius precipitari queant, cum spiritu vini nil subtilius reperiatur. Et paulo post pergit: Nam cum neque per acida, neque per urinosa precipitari queat, dubium nullum est, quin in corpore humano cum spiritu suo vini subtilissimo ad cor & sanguinem elevetur."

Adduxi vero hæcce allegata, ut ex horum collectione & ad menstruum nostrum applicatione facilius dispalescat, ubi & in quantum à via regia vel recedant, vel ad illam accedant, paucula illa tentamina.

Cæterum lubens fateor, paucissima ex amplo tot phænomenorum oceano me exhaustisse, plurima ulteriori indagationi & alii tempori reservata esse. Nihilominus tamen, non ægre ferent, spero, Pyrotechnophili, si rem non absolutam, sed inchoatam tantum Eruditorum oculis subicere ausus sum, id enim eò obtineri spes est, mea & intentio: ut quibus non sufficio, illa ingenio & occasione feliciores suppleant ac emendent.

Deo verò T. O. M. pro concessis viribus sit Laus,
Honor & Gloria in omne Seculum.

Nobilissimo Domino Candidato

S. P. D.

P R Æ S E S.

I Bone, quo Tua Te virtus vocat, i pede fausto! Absolvisti alacriter vastissimum Medicinæ studium, ea felicitate, quæ Ingenium diligentia singulari excultum largissimè nunc coronat. Relinquis Academiam, ac peregrinis
in

in Terris ulteriora Artis, jam solidè firmatæ quæris subsidia;
 Paterna feliciter premis vestigia, cujus per omnem Europam
 Fama percrebuit dudum; hæcque Tibi Batavos inter, An-
 glosque, & Gallos aditum conciliabit ad Lumina Eruditi hu-
 jus Seculi facillimum. Noluisti tamen valedicere Musis nostris,
 sine publico Testimonio profectum egregiorum, obtentaque
 doctorali, quam vocant, Licentia, imponendo Colophonem
 Studiis Inaugurali Disputatione, exhibente vexatissimum The-
 ma, Solventisque Universalis, cui Alkahest, splendidum
 prisca Chemicorum Schola nomen dedit, & genium, & Curio-
 sum quoddam, plurimumque eò appropinquans specimen, eò
 majori dignum attentione, quò Autorem agnoscit difficillimis
 rebus efficiendis profunda, arduaue meditatione aptissimum,
 Tibique vel ipsa oculi pupilla cariorem. Perge bonis avibus!
 Vastum est, quo decurris stadium, collige majores subinde apud
 Exteros flores, enchireses, laborumque compendia; Dies, in-
 ter furnos etiam, diem docet. Selige ubique certa, solida,
 ac firma, relictis speciosis, infucatisque multorum Ciniflonum
 ineptiis, ac inanum laborum mæandris, qui magno conatu
 nihil agentes vasta promittunt, dum immensa cavi spirant
 mendacia folles. Candor ac simplicitas solida artis præ-
 cepta semper indivulso comitantur pede. Ita Vale,
 commendatus Clementiæ Divinæ.

